



Naalackersuisut kingusinnerpaamik UPA2020-mi Kalaallit Peqqissartut Angerlarsimaffianni kalaaliminernik atuinerup qanoq iliorluni annertusineqarsinnaanera pillugu misissuineramik suliaqarnissaat pillugu Inatsisartuni aalajangiiffigisassatut siunnersuut. Misissuinermi - ajornanngippat - igaffissuarmi igaat kalaaliminersunninnerat qanoq ililluni annertunerulersinnaanera pillugu kaammattuuteqarfigineqassaaq.

(Inatsisartunut ilaasortaq Stine Egede, Inuit Ataqatigiit)

Kalaaliminertorluni soorlu aatsaat nerilluni, qaarsillarluni. Kalaaliminertoraangatta oqaaseq una annikkajupparput: qujanaqaarmi kalaaliugama! Tassali nerisatta pilluaataallutillu nukittornarneri malugisangaaratsigit. Kalaaliminertunngilerutta soorlu nukissaarulluta, kaattualerluta.

Taamaappaaruaq aamma napparsimasuulluni. Napparsimasuulluni misinnartarpoq nerisat kisimik nukittortitsisinnaasut, tassalu kalaalimernit. Taamaammat napparsimaveqarfitsinni sumiluunniit napparsimasortatta peqqinnartunik kalaaliminernik nerisinaanissaat qulakkeerniartariaqarparput.

Inuit Ataqatigiit Stine Egede qutsaviugiumavaat Naalackersuisut Kalaallit Peqqissartut Angerlarsimaffianni kalaaliminernik atuinerup qanoq iliorluni annertusineqarsinnaanera pillugu misissuineramik suliaqarnissaat pilersaarusoqummagit.

Kalaallit Peqqissartut illuat Danmarkiippoq, Danmarkilu EU-mut ilaasortaavoq. Taamaalilluni EU-mut nerisassat eqquteqqusaasut killilersugaapput, soorlu kalaalimernit suut eqqunneqarnissaat killeqarlutik. Tamannalu Naalackersuisut Danmarkimilu naalackersuisut ataatsimoorlutik iluarsiiviginiartariaqarpaat, soorlu immikkut eqqussisinaanermik inatsimmik pilersitsinikkut.

Aaammattaaq Danmarkimi inuussutissalerinermut inatsit qiviarneqartariaqarpoq, tassami igaffiit taakku nerisassat uumasut nakorsaaniit, assingusunilluunniit misissorneqarsimanngitsunik igaqusaannginnamik. Kalaalimernit soorlu puisit taama misissorneqarneq ajorput, taamalu Danskil igaffissuini igaqusaanatik, soorlu Peqqissartut angerlarsimaffianni.

Tamanna qanoq allanngorsinnaanersoq Naalackersuisut misissortariaqarpaat, aqutissiuussillutillu kalaaliminilorsinnaanermik.

Napparsimasoq nukeeruteqqasoq, taamalu nakorsarsinnaajunnaarallaqqasoq naammattoornikuuara. Neriumanngilaq, nukeerukkiartorlunilu. Nammineq nassataqariarama igaffeerannguami kalaaliminertoqatigaara. Annertuumik nerinngikkaluarpoq, malugaarali kingorna neriumassuseqaleqqittoq, taamaalillunilu nakorsarneqarnera ingerlaqqissinnaanngorluni.

Taamaatorpassuusarunarput, taamaamat Naalakkersuisut Peqqissartut Angerlarsimaffianni kalaaliminernik atuinerup qanoq iliorluni annertusineqarsinnaanera pillugu misissuisariaqarmata siunnersuut akueralugu ataatsimiitsitaliamut susassaqartumut ingerlateqqipparput.